

**Umat Islam Perlu Elak Sifat Boros, Riak Pada Bulan Ramadan, Titah Raja Nazrin Bernama
7 Ogos, 2012**

IPOH, 7 Ogos (Bernama) -- Umat Islam perlu menghayati kesucian roh Ramadan dengan mengelak daripada melakukan pembaziran, bersifat boros serta riak bermewah-mewah dan bermegah-megah ketika menyambut Syawal, titah Pemangku Raja Perak Raja Dr Nazrin Shah Selasa.

Baginda bertitah menahan nafsu lapar dan dahaga pada bulan Ramadan sewajarnya diperlengkap dengan kekuatan melawan nafsu membazir.

"Meskipun kita diwajibkan berpuasa di siang hari, tetapi di bulan Ramadan ini, kemewahan makanan terhidang dalam beraneka rupa dan beraneka rasa. Di samping restoran dan warung sedia ada, pasar-pasar Ramadan tumbuh bagai cendawan di serata tempat.

"Di samping menu dan juadah berharga mahal yang sedia ada, hotel-hotel ternama turut menganjurkan juadah berbuka puasa berharga tinggi dengan hidangan yang melimpah ruah, laksana berlakunya pesta menjamu selera yang ada kalanya diselang seli dengan hiburan," titah baginda pada persidangan Majlis Agama Islam dan Adat Melayu Perak kali ke-180 di sini, hari ini.

Baginda bertitah mengingatkan bahawa Islam menganjurkan kesederhanaan dalam semua perkara.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=686302>

